

Sosteni door di e desaroyonan economico faborabel, fondo di pensioen APFA a logra fortalece su posicion financiero substancialmente. Aña 2018 a habri positivo pero den transcurso di e prome mitar di 2018 a topa cu desaroyo economico menos faborabel cu a ocasiona un caida leve di e grado di cobertura. Sinembargo APFA tin un adelanto amplio riba e plan di recuperacion cu mester trece e capital di pensioen riba e nivel rekeri.

NPR 2014	30 di juni 2018	31 di december 2017	31 di december 2016
Capital di pensioen	Afl. 2.802 miyon	Afl. 2.794 miyon	Afl. 2.655 miyon
Provision obligacion di pensioen	Afl. 2.600 miyon	Afl. 2.581 miyon	Afl. 2.546 miyon
Grado di cobertura bruto	107,7%	108,3%	104,03%
Grado di cobertura netto	98,4%	99,1%	96,0%
Prima di pensioen	16,6%	16,8%	16,6%
Participante	6.891	6.827	6.715
Ex-participante	893	823	746
Pensionado	4.029	4.052	4.027

## Posicion financiero a mehora substancialmente na 2017 y a baha levemente den prome mitar di 2018

Den 2017 e posicion financiero di e fondo a mehora substancialmente danki na e resultadonan di inversion excelente. Door di esaki e grado di cobertura bruto (e relacion entre e capital y obligacionnan di e fondo) a yega 108,3% na final di 2017 cual tabata un mehoracion hopi grandi den comparacion cu fin di 2016 (104,3%). Pa motibo di e desaroyo negativo riba e mercadonan financiero internacional, e resultadonan di inversion den e prome mitar di 2018 a cay atras compara cu 2017. E capital di APFA a aumenta levemente te Afl. 2,8 biyon den e prome mitar di 2018. Sinembargo door cu e obligacionnan a aumenta mas hopi y a yega te Afl. 2,6 biyon e grado di cobertura bruto a baha levemente na fin di juni 2018 compara cu principio di e aña aki.

## APFA tin un adelanto amplio riba e plan di recuperacion

E grado di cobertura netto, cu ta tene cuenta cu e reserva di inversion rekeri segun exigencia di Banco Central di Aruba, mester ta 100%. Na final di 2017 e grado di cobertura netto tabata 99,1%. Esaki ta ampliamente riba e nivel di 94,8% cu APFA mester a alcanza na final di 2017 segun e plan di recuperacion. E fondo ta recuperando pues mas lihe di locual a anticipa. A pesar di e caida di e grado di cobertura netto te 98,4% den e prome mitar di 2018, APFA tin ainda un adelanto amplio riba e pronosticonan di e plan di recuperacion.

## Rendimiento excelente den 2017

APFA a alcanza durante aña pasa un rendimiento promedio di +7,4% riba su inversionnan total pero principalmente pa e inversionnan den exterior, e tabata un aña excelente. E accionnan den e portafolio di inversion a subi substancialmente den balor sosteni pa e gran crecemento economico mundial. Otro desaroyo positivo tabata e cifranan di ganashi di e companianan, e reduccion di impuesto na Merca y e interes riba e mercado di capital cu e keda abou. Aunke cu Banco Central di Merca a aumenta e interes di maneho diferente biaha den 2017, esaki tabata tin un efecto minimal riba e sentimento di e inversionistanan. Mundialmente e interes riba obligacion di duracion largo a baha minimalmente den 2017. Como consecuencia e obligacionnan den e portafolio di inversion di APFA a cera aña pasa cu un rendimiento positivo.

APFA a logra den 2017 cu su inversionnan den exterior un rendimiento di +11.5%. Esaki ta 1,6% mas halto cu e rendimiento di e benchmark componi. E benchmark ta e forma con APFA ta compara anualmente su resultado di inversion. Den e portafolio di accion (+21,5%) principalmente e accionnan di e mercadonan emergente a duna hopi bon rendimiento (+35,9%). Tambe den e portafolio di obligacion (+5,4%) e region cu a presta miho tabata e mercadonan emergente (+6,9%).

## Desaroyo menos faborabel den 2018 despues di comienso positivo

Aña 2018 a cuminsa positivamente, pero e mercadonan financiero a coregi nan mes atrobe. E crecemento economico te ainda ta robusto pero awor tin un desaroyo menos faborabel cu ta haci cu e inversionistanan ta bira mas cauteloso. E banconan central ta stimula e economia cada bes menos, inflacion ta subi poco poco y e guerra di comercio entra Merca y resto di mundo probablemente lo sigui escala. E mercadonan financiero ta sensibel pa desaroyo negativo door di e valoracionnan halto, cual ta haci cu tin mas movilidad.

APFA a logra durante e prome lunanan di 2018 un rendimiento riba e inversionnan den exterior di -0,1% compara cu 0,0% di e benchmark componi. E obligacionnan den e portafolio a baha un poco den balor (-0,36%) mientras cu e accionnan a conoce un aumento den balor di (+0,18%).

## Crecemento di e cantidad di participante

E cantidad di participante den e fondo ta sigui crece. APFA ta administra na final di juni 2018 e pensioen pa mas cu 11.800 participante incluyendo ex-participante (conoci como 'slapers') y pensionado.

## Enfoke pa 2018

APFA ta anticipa cu 2018 lo ta un aña cu hopi desafio mirando e desaroyonan riba mercado internacional. APFA lo keda concentra riba e posibilidadnan pa optimalisa su rendimiento di inversion y lo hiba un maneho adecua di e riesgonan involvi cu esaki. Na e momento aki APFA ta investiga e posibilidadnan pa inverti localmente den diferente proyecto y recientemente a firma un declaracion di intencion cu gobierno pa desaroya un proyecto di vivienda na Burunbundu.

APFA lo dirigi su atencion den 2018 tambe riba e posibilidadnan pa aumenta cantidad di su participantenan y lo investiga e introduccion di producto di pensioen nobo.

## Reunion general di participante na september

APFA lo organisa na september su reunion general di participante anual. Den e reunion aki directiva lo presenta e relato financiero di 2017 na e participantenan y pensionadonan di e fondo. Tambe lo elabora riba e desaroyonan financiero den 2018.

Pa mas informacion; bishita nos website [www.apfaruba.org](http://www.apfaruba.org)

